



Jumat, 05 Pebruari 2021

Ogen: Kejadian 29:21-22



TENAH KERJA



Ibas budaya-budaya si lit i doni enda, kerina komunitas masyarakatna mbelin iketen ras hubungenna. Sienda tangkas nuriken maka manusia eme 'mahluk sosial', sada ras sidebanna erkawiten ras saling merluken. Perdalanen geluh sekalak jelma la terlepas ibas hubungan e. Umpamana tubuh, erjabu, mate kerina e jadi sada liturgy kegeluhen si isaksiken sangkep geluh. Sidahi-dahin, saling mpegegehi, erbagi ibas keriahen ras kesusahan. Sienda kerina idalani alu nenahken kerina kade-kade, gelah ibas kerja siilakoken kuh sangkep geluh naksikenca. Termasuk lit ije tanda si ialokenna (utang adat).

Ibas renungenta paksa enda ituriken kerna Laban, orangtua Lea ras Rahel, sindube enggo erbahan percakapan kerna sura-sura Jakub ngempoi anakna enggo seh. Perjanjin 7 tahun erdahin guna ngempoi anak Laban. Ibas sie ituriken maka Laban nenahken kade-kade guna ngerjaken anakna. Itenahkenna si biak man katanken, siarus reh ku kerja erdemu bayu anakna e. Sienda nuriken maka bageme masyarakat ngergaken sangkep geluhna ibas kerina peradaten siilakoken. Tentuna kerehen kade-kade kubas kerja e ngkuhi keriahen ukur simada kerja.

Ibas peradatenta kalak Karo, adi sipergermetken sope bulan Maret 2020 luar biasa teremna pulung dikune lit kerja-kerja. Rutang siakap dikune la kita reh ibas tenah sialoken kita. Ijapa pe dem jambur ibas kerja, seh makana wari kerja pe megati itentukan lit jambur kosong nta lang. Tangtangna mewabah covid 19, la sitik perjabun siundur amin pe enggo erdalan undangan sabab pembatasan kalak pulung. Tapi perpudi enda amin virus ras korban covid reh teremna tapi kebiaren tempa bagi si kurang. Ula kal sipaksaken, sierkerja pe batasi dengalah, Protokol kesehatan jadi hal si penting kal ilakoken.